CBETA電子佛典集成

CBETA Chinese Electronic Tripitaka Collection ebook

T12n0379

四童子三昧經

隋 闍那崛多譯

目次

- 編輯說明
- 章節目次
- 卷目次
 - 001002
- 003贊助資訊

編輯說明

- 本電子書以「CBETA 電子佛典集成 Version 2022.Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 379 [No. 378]

四童子三昧經卷上

隋北印度健陀羅國三藏闍那崛多譯

如是我聞:

一時婆伽婆在俱尸那國力士居地娑羅林所二雙樹間。爾時,如來思惟:「今日涅槃時到,應當取滅。」

長老阿難即於其夜歘得惡夢,驚怖憂惱,馳向佛所,愁慘合掌,瞻 仰世尊,目不暫捨。

爾時,佛告長老阿難:「瞿曇彌子!何故如是熟視於我,眼不暫瞬?」

爾時,阿難即白佛言:「世尊!我於昨夜忽然見夢,身毛為竪,甚大怖懼,必是如來涅槃先相。世尊!我既見是非吉夢已,心無情賴,深生憂惱,恐畏世尊速入涅槃。」

佛告阿難:「瞿曇彌子!<u>汝</u>見何夢,知是如來涅槃先相,而生驚怖?」

爾時,如來即以此偈問阿難曰:

「汝夢何所見, 在娑羅林所, 謂涅槃先相? 彼相為我說。」

爾時,阿難即以偈頌白世尊曰:

「昨夜所見夢, 可畏身毛竪, 恐怖心大驚, 世尊今當聽。 忽於世界中, 出生廣大樹, 微妙甚可觀, 常有諸花果,

普覆眾牛界, 其蔭甚清凉。 若蒙在樹下, 受樂除憂患, 聞聲得淨耳, 觀樹得淨眼、 成就多功德, 高至於有頂。 彼樹出妙聲, 具說諸法相, 微妙義具足, 安樂諸眾生; 彼樹出光明, 如恒河沙數, 充滿如是剎, 所照無不遍, 諸有十方界, 無量難思議, 光明所觸者, 必當得利益; 彼樹出妙香, 普熏十方剎, 若聞此香氣, 不墮諸惡道, 亦不墮地獄, 及不墮畜生、 餓鬼、阿修羅, 皆至於善趣。 如是大妙樹, 安樂諸眾生, 摧折力士地, 臥於雙樹間。 爾時千數眾, 無量不思議, 見此大樹倒, 悲號而哀泣。 忽不聞彼聲, 亦復不聞香, 各不能自起, 我亦洣悶倒。 我昨夢如是, 無量可畏相。 具眼為我說。」 如我所見事,

爾時,淨居諸天子及娑婆世界主、大梵天王、并商主魔王子、天主 憍尸迦、四天王等,并諸眷屬,各於住處聞佛世尊涅槃之相,各及 八十餘那由他眷屬諸天子等,前後圍遶,往詣佛所,頂禮佛足,皆 悉同聲,悲號懊惱,憂愁泣淚。即向阿難而說偈言:

「嗚呼大苦哉! 阿難汝具知, 如來雙樹間, 欲取於滅度。 無燈為作燈、 無歸為作歸, 欲入於寂靜, 無餘大涅槃。」

爾時,世尊向慧命阿難及諸天眾而說偈言:

「汝賢莫憂苦, 如所見無異,

今夜取涅槃, 在於雙林下。 彼之大樹者, 枝莖不思議, 具光明香氣, 摧折雙樹間。 如樹佛亦然, 今欲詣彼所, 入無餘滅度, 如水滅大火。 舍利、目連等, 神涌、智慧最, 二人已滅度, 汝今豈不知? 諸行皆如是, 無常生滅法, 佛知如是相, 知己為眾說。 阿難!汝當告, 我諸聲聞等, 天眼最第一; 上座尼婁陀, 上座鉫旃延、 上座俱絺羅、 難低及牛呞、 富婁、須菩提、 輸那摸伽王、 著糞掃衣者、 難陀、羅睺羅, 及餘諸聲聞, 學無學人等、 及諸餘凡夫, 一切谏告知, 不久我滅度, 勿於涅槃後, 而生彼苦惱。 有學及凡夫, 不見大生苦, 我慰喻彼等, 曉示直法相, 諸行皆如夢, 無常汝莫憂。」

爾時,世尊如是說已,慧命阿難即以偈頌白世尊曰:

「世尊!我迷方, 舉身皆戰慄,

聞佛欲滅度, 我愁憂不少,

體畏無歡喜, 心益增悲悼。

離欲亦如是, 其眼云何去?

云何告上座, 諸眼第一者,

今日大悲尊, 見已更不見?

我今自憂苦, 云何告彼苦?

上座云何聞, 苦惱大怖事?

學人云何住, 及餘諸凡夫?

憂悲箭所射, 願尊住一劫。

云何於四眾, 宣說世尊滅?

世尊為我說, 願尊住一劫。

大炬逝速疾, 滅沒於世間,

世間大黑闇、世間永盲冥。

我不能告彼, 世間大苦事, 世尊更遣餘, 無有憂苦者。」

佛告阿難:「瞿曇彌子!汝莫憂苦,諸行性相悉皆無常。」爾時, 世尊即說偈言:

「阿難!億諸天, 聞佛欲涅槃, 悉捨天宮殿, 憂愁大苦惱。 侍者汝正業, 汝去告比丘, 我涅槃之後, 懊惱不見我。」

爾時,慧命阿尼婁陀在須彌山頂為三十三天正當說法。是時,即以清淨天眼過於人眼觀見大威德諸天子等捨於宮殿,復聞諸天叫喚,大聲悲號啼哭,復見己之徒眾眷屬悉皆四散。

時阿尼婁陀正念甚深,天眼之明,重復觀察諸天子等各及眷屬,捨己欲樂,憂悲苦惱,速疾捨離,相續而去。

時阿尼婁陀更復觀見須彌山王及諸山峯——或高百由旬或二百由旬、三百由旬、四百由旬——摧剝崩倒,或五百由旬,或復無量須彌山峯,崩倒墮落大海水中,於彼眾生無所損惱,亦無傷害。尚不損惱於一眾生,況多眾生?亦不傷害於一眾生,況當傷害於多眾生?彼須彌山王所有依住天、龍、夜叉、乾闥婆、阿修羅、緊那羅、摩睺羅伽,聞於如來欲入涅槃,悉皆憂悲,生大苦惱,同時趣向俱尸那城,速疾急行。當速行處,須彌山峯而自崩倒,音響震動,並出聲言:「今大釋種釋迦牟尼,釋中勝王,於阿僧祇億劫苦行,修諸善根,今於力士所生之地,娑羅林所在雙樹間,欲入無餘寂滅涅槃。諸天人等皆當眼滅。」彼皆忽遑,速疾而行,大須彌山及大海水皆悉撓動。以是事故,此大須彌山王之峯及大山谷崩倒墜落,沒入大海。

爾時,阿尼婁陀正住須彌山頂,即發大聲而說偈言:

「世間大商主, 眾生大福田, 與世間樂報, 此仙今涅槃。 往昔能作大功德, 是大醫王治眾病, 拔刺無礙無所著, 彼仙今欲入涅槃。 輪轉無明、生、老、死, 見諸眾生多欲患, 處在牢獄顛倒見, 起大慈悲為說法。 動諸魔眾瞋恚來, 猛毅鋒刃欲加害, 示現種種恐怖事, 或執大石及山崖, 如是等眾甚可畏, 見之身毛不驚動, 彼尊能破如是魔, 今欲入滅雙樹間。 右手舒展指於地, 振吼聚落及諸山, 今欲涅槃雙林間。 彼仙自在大法王, 能打大地出大聲, 聞不思議十方界, 彼勝眾生大智者, 今欲涅槃雙林間。 昔魔兵眾大可畏, 已得難動無畏處, 轉於四諦大法輪; 彼大仙人為眾說, 現諸神涌無與等, 一切世界置毛端, 眾生不知亦不覺, 彼尊今欲入涅槃。 今已到於力士地, 在於娑羅雙林間, 入大寂靜三昧中, 欲趣涅槃如火滅。」

爾時,尊者阿尼婁陀說此偈已,以佛神力,閻浮提內所有比丘、比丘尼、優婆塞、優婆夷——惟除上座摩訶迦葉及諸弟子徒眾眷屬——自餘二百四比丘眾、諸餘所有四部眾等,馳趣娑羅雙樹林間,同來聚集,禮世尊足,各作是念:「我等今者即是最後覲見世尊。」

時阿尼婁陀說是偈已,應時三千大千世界所有大威德諸天人等,及 諸天天子、天女,諸龍龍子、龍女,及諸夜叉、夜叉男女,毘舍 遮、毘舍遮男女,一切諸天人、阿修羅、迦樓羅、緊那羅、摩睺羅 伽、人非人等,星宿行處。如是等一切大眾皆悉號咷,流血灑地, 面淚滿目,心皆迷毒,叫喚舉聲,哀慟大吼,駭動天地。憂箭所射 心無情賴,惋歎感傷哪吚諮嗟,諸根悲塞頓悶斷絕,宛轉于地舉身 戰慄,手足垂路受大苦惱。 其間或有相視而哭;或以手拳自拍頭頂摑裂驅面而大號哭;或有轉 眼或復轉膝而大號哭;或按兩髀如燒脚足而大號哭;或復唱言:

「嗚呼佛陀!嗚呼佛陀!」而大號哭;或手拭眼、或手捫面而大號 哭;苦箭入心號咷哽絕,痛哀悲惱不能自定而大號哭。如是無量千 億眾生淚墮如雨,長歔歎息,絕而復穌。或合爪掌涕淚交流而復號 哭;或以右手搘頭涕淚低頓躄地而大號哭;或以左手扣頭悵快憂火 所燒而大號哭;或身體萎悴宛轉煩惌而大號哭;或擲兩手面失本 色,迷悶哽塞而大號哭。

爾時彼諸天、龍、夜叉、乾闥婆、阿修羅、迦樓羅、緊那羅、摩睺羅伽各及眷屬馳趣佛所。到佛所已,在於佛前,皆悉撲地如斫樹倒,或禮佛足、或大叫喚、或大號咷宛轉于地、或在佛前舉雙兩臂遞相攀攀,叫呼號哭並唱是言:「嗚呼佛陀!嗚呼大尊!嗚呼達摩!嗚呼大慈!嗚呼大宅!嗚呼大歸!憐愍我等、救護我等,三界之眼失路示路,一切世間當成空曠、一切眾生當盲無目,大智炬明今日永滅。」互相執挽如喪父母、親戚、兄弟、姊妹、兒女,如是種種號咷悲哽,呼聲大哭。或如是言:「嗚呼我尊!嗚呼我等大善知識!嗚呼巧說微妙美言!嗚呼行步如師子王!嗚呼行步如大牛王!嗚呼行步如大象王!嗚呼演暢甘露法王!」如是種種無量哀辭,悼傷痛切而大號哭、或從虛空撲身墮地,悶絕宛轉,悲哽號哭。

爾時,阿難悶絕撲地如斫樹倒,良久乃穌,在於佛前兩手據地,瞻仰世尊,目不暫捨,而說偈言:

「倍生我苦惱, 以見眾生等, 被苦箭所射, 悲號大哭泣。 譬如絕闍路, 商人被劫賊, 忽見大火明, 照於眾人前, 更增彼大怖, 無方得馳走, 觸處無依怙, 以見火聚故。

以如來滅度, 多眾皆悲苦, 如是無救者, 更被苦箭射。 世尊不住世, 餘者復涅槃, 最勝人滅度, 我見云何忍? 放熾大光明, 如薪盡火滅, 墮於力十地, 我云何忍見? 今更不復見, 在於竹林下, 如常說法時。 及在祇陀園, 云何入毘耶, 離車最勝城, 向諸離車語, 最勝人滅度? 云何入迦毘, 釋種最勝城, 告彼不喜言, 最勝人滅度? 云何詣闍世, 摩伽陀勝王, 云何說此言, 如來入滅度? 多數千眾生, 數數而哀泣, 云何慰喻彼, 釋師子滅度? 比丘、比丘尼、 及諸在家眾, 汝釋王滅度? 云何告此言, 或在經行所, 及入大禪定, 天龍所問時, 無畏云何說? 『阿難!佛何在, 福田最勝人?』 諸上座問已, 世尊我何報? 我為誰敷設, 師子大法座? 大師子臥床? 復為誰敷設, 眾中無所畏, 如大師子吼, 復更誰邊閏, 甚深無比法? 與誰洗足水? 為誰執袈裟? 最勝人滅後, 更為誰執捉? 誰復大眾前, 讚歎我勤劬? 誰復讚歎我, 多聞大智海、 智慧大辯才? 無邊眾歡悅, 我更對誰聞, 微妙軟美言? 彼聞持佛子, 如是傷歎已, 在於佛足邊, 悶絕而倒地。」

爾時,世尊告阿難言:「瞿多彌子!莫過愁毒、莫大迷悶,我於前時已曾語汝如此之義:『一切恩愛悉有別離,一切諸行並皆無常,

如夢、如幻、如焰、如泡、如沫、如露,虛妄不實,諸行亦爾。』 汝已知之,瞿多彌子!汝時可起,但當速去,可為如來於雙樹間安 置床鋪,頭向東,首高如牛頭;面正向北,右手搘頰;雙樹之下偏 約南邊。如來世尊今後夜分當入涅槃,滅除無餘有為身分,此之涅 槃。」

爾時,阿難啼哭、號咷、愁毒、懊惱、淚下滿面,奉世尊勅,敷師子床於彼娑羅雙樹林所。舒安訖已,而說偈言:

「我今最後設, 大仙師子床; 於後更不敷, 最勝人臥鋪。 我云何忍見, 空林雙樹間, 最勝人滅後, 寂不見世尊? 最勝人滅後, 空守於長夜, 置護林神等, 空守於長夜, 云何樂住此? 明呼無常行, 如幻如夢泡, 丈夫教導師, 今日當滅度。」

爾時,尊者阿尼婁陀即便說偈,告阿難言:

「如來先已說, 諸行悉無常, 因緣不自在, 汝強心莫憂。 豈以汝憂悲, 及以啼哭故, 無常事已爾, 智者莫迷悶。」

說此語已,是時阿難即復以偈報大尊者尼婁陀言:

「無畏尼婁陀! 願莫作是語, 覩勝人滅度, 尊豈無憂愁?」

是時,尊者阿尼婁陀復更以偈報阿難曰:

「我眼豈無淚? 為之以裁忍。 見萬類眾生, 多為愛所逼, 又我天眼見, 諸苦惱眾生, 為彼等大悲, 是以應號哭。 為利於世間, 不以懊惱故, 是故我語仁, 莫憂當念法。」

爾時,世尊從座而起,一切天人、諸龍、夜叉、乾闥婆、緊那羅、摩睺羅伽、阿修羅、迦樓羅等,百千億眾圍遶世尊,詣娑羅樹林。至已,右脇臥師子床。世尊臥彼師子床已,時虛空中即兩天華及天末香,作諸天樂億百千種,又齎世間種種人華、種種末香、種種塗香、種種音聲,供養世尊,植諸善業,各口唱言:「此是世尊、多陀阿伽度、阿羅訶、三藐三佛陀最後而臥,亦是我等最後觀見世尊於彼剎那羅婆牟休多間。」

是時,東方有一世界名寶鳴主,去此佛剎十千俱致。彼國土中有佛,名曰師子鳴聲多陀阿伽度、阿羅訶、三藐三佛陀。其世界中有一菩薩名善思義,從彼應託來到此土王舍城中,摩伽陀國,韋提希子阿闍世王宮內化生,結加趺坐。彼既生已,說此偈言:

「我從師子吼,如來剎土來, 聞此有世尊,釋師子在世。」

爾時,空中有一天子以偈報彼善思義菩薩言:

「今者彼人王, 世尊釋師子, 於娑羅雙樹, 欲入於涅槃。」

說是語已,時善思義菩薩摩訶薩即便以偈報彼天言:

「難計諸佛剎,百千俱致數, 我從彼土來,聽釋師子法。 值彼欲滅度,當趣雙樹間, 我不實空來,到於斯剎土。 我今已來此,彼尊當涅槃, 諸天等世間,悉愁況於我。 一念此不住,應速見世尊,

勿令我空來, 而不得見佛。」 善思義勸諫, 摩伽陀國王, 發哀美善言, 今彼心歡悅。 「大王聽我語, 大人出世間, 王莫放縱心, 速 請於佛所, 於數千億劫, 或當一遇時, 今既值彼師, 智者莫空過。 謂我小兒癡, 願王勿疑意, 我非癡小兒, 王自小兒耳。 貪於世欲樂, 殺父浩逆殃, 此是小兒癡, 當墮於惡道。 干折惡知識, 調達鬪亂人, 故殺無過父。 隨順彼逆心, 王如法無比, 直是佛子儔, 但以有我心, 無智故興逆, 如此大惡逆, 恐怖事非輕, 以是王必當, 墮大阿鼻獄。 及佛今現在, 未入涅槃間, 當興供養心, 佛諸舍利骨。 願王施歡喜, 我欲詣佛邊, 來生此十中, 不為受諸欲。 我以聞本土, 師子鳴如來, 稱此大仙人, 猶師子滅度。 欲得奉見故, 來生此十中, 一時詣向佛。」 諸刹利宗親,

爾時,阿闍世王即以偈告彼童子言:

「力士生地去此遙, 不可輕往須嚴駕, 童子汝但今夜待, 明整兵馬安樂行。」

爾時,善思義童子還復以偈報阿闍世王言:

「大王慎莫生嬾惰, 我神通力不思議, 我今若欲過東方, 無量佛剎無限礙。 元從所來佛剎土, 經歷無量無有邊, 其間佛國如恒沙, 力士生地竟何遠?」 爾時,童子從阿闍世懷裏而起,徒步而行,發王舍城安庠而出,說此偈言:

「欲覩清淨無過佛, 大力能降最勝人, 汝等隨我速往見, 及彼釋仙未入滅。」

爾時,童子從王舍城徒步出已,當彼剎那羅婆時頃,有於七萬二千人眾集聚圍繞,復有無量無邊百億那由他諸天眾,隨彼童子往詣佛所,為欲頂禮如來足故。

爾時,世尊作人師子右脇臥已,於彼剎那羅婆牟休多間,從彼南方去此佛剎,五百千億佛之世界有一佛剎,彼佛號曰寶積善現如來,十號具足。彼有菩薩名寂靜轉,從彼剎沒,於此世界閻浮提地舍衛城內,生大居士似師子家。即於初生,而說偈言:

「於何數億劫, 割捨其手足, 挑眼破身分, 斷截無量頭, 妻妾男女等, 一切諸財寶, 於千億數劫, 求無上菩提。 為度諸群生, 布施廣修福, 無量百億劫, 彼眼者希有。」

爾時,似師子居士以偈報童子言:

「汝為是天龍, 為夜叉、羅剎? 汝即生之頃, 分明出語言。 我眷屬悉怖, 馳走散諸方; 我聞佛名聲, 是故我不走。」

爾時,童子以偈報居士言:

「我非天非龍, 非夜叉、羅剎。 汝居士不知, 謂我是世人, 言天、龍、夜叉、 緊那、摩睺羅。 我是天中天, 居士汝當知。」

爾時,似師子復以偈答童子言:

「我心復有疑, 童子我復驚, 聞汝如是言, 同於智者說。 云何天及龍, 夜叉、緊那羅? 云何天中天? 童子更重說。」

爾時,童子以偈報居士言:

「去此南方界,有佛名寶積,現在如師子,我從彼處來。 百過作帝釋,自在亦作來, 百過作梵天,亦作轉輪王, 我欲多時說,一劫或億劫, 不可得說盡,智者速詣佛。

「唯然,大居士!汝常應修如此法行,親近心念廣作顯示。大居士!何者法行?如來當說,彼寶積善現如來十號具足,有諸菩薩摩訶薩等成就三法,於菩提心得不退轉,復當速證無上菩提。何等為三?一者入無邊心、二者入甚深智、三者入堅固修行三昧。」

爾時,彼童子欲重宣此義,而說偈言:

諸天世人所愛重, 「若欲入於甚深智, 善能知因及非因。 惟有諸佛大名稱, 此智無有染著處, 彼句無非菩提者, 捨諸著已離毒箭, 證法智已得作佛。 念心無邊無有心, 入如是心得寂静, 此心名為遍一切。 隨順是心名為入, 若破若斫彼不堅, 無破諸法如來說, 諸有猶如虚空體, 如是真如如金剛。 應知如是自性空, 若能修此無所著, 彼即出離煩惱網, 當成正覺離諸有。 當知一切無有知, 當證一切無所證, 當覺一切無所覺, 一切聞聲無取著。 入甚深法無法想, 解脫眾生無脫想,

廣寂無有廣寂想, 得證菩<mark>提</mark>無道想, 彼真健人除毒箭, 了達眾生諸所趣。 知一切故名為佛, 難可輒近無所著。」

爾時,童子說此偈已,於剎那羅婆牟休多時,似師子居士即與眷屬二百人俱左右圍遶,便發阿耨多羅三藐三菩提心,迴向菩提,於諸法中得無生忍;十八億諸天子等亦發阿耨多羅三藐三菩提心,究竟菩提無有退轉;復有四那由他眾生,於諸法中遠離塵垢得法眼淨。

爾時童子復說傷言:

「我今不空來, 往釋師子所。 於生死怖中, 度那由他眾。 有多眾生數, 已發菩提心, 住無上平等, 證得無生忍。 我父住法忍, 我母、兄、眷屬、 十八億諸天, 皆住菩提道。 我得大財寶, 無量不思議, 於佛法轉近, 去貧窮稍遠。」

爾時,寂靜轉童子化其父母及眷屬已,出舍衛大城,共其父母并諸眷屬、無量百千諸眾生等,左右圍遶在於眾前,趣向力士所生之地娑羅林,所欲禮佛足,覲見世尊。

爾時,如來在於師子床上右脇臥時,於彼剎那羅婆牟休多時,西方去此過八億百千佛剎,有佛名號樂音如來,十號具足。彼佛剎土有一菩薩摩訶薩名無攀緣,從彼佛剎隱滅身已,於此佛剎閻浮提地,波羅奈國大城之內,有大居士名善鬼宿,於其家內而忽化生。時無攀緣童子即於生時而說偈言:

「諸法無攀緣, 愚癡覺所轉, 彼不脫眾苦, 增長諸憂惱。 諸法無處所, 求之不可得, 若盡及不盡, 一切無所有。 虚空無所依, 非空亦無依, 空法因緣無, 因緣亦不無。 深隱難知見, 彼諸所說法, 頗有能說者, 人尊釋師子。 大象、大師子, 如梵無諸欲, 今日於雙林, 將滅世間眼。 在於大眾中, 如月十五日, 為眾說妙法, 彼更不可見。 比丘眾圍繞, 如帝釋山頂, 自今更不入, 一切諸妙城。 天人中極尊, 法鼓最勝者, 發音令眾悅, 我等不復聞。 無我、無作者, 如來說是法, 今欲入滅度, 娑羅雙樹間。」

爾時,無攀緣菩薩說此偈已,波羅奈城一千徒眾作如是言:「此童子者甚奇希有,智慧辯才無畏深入,生已乃能憶知宿命生生之事,復能巧說種種妙偈,乃有如是大力智慧,無畏難伏淨妙辯才,願令我等得如是智若此童子。」爾時,無攀緣童子欲令大眾入不退地,世間所無不共之法,希有難得、無量無邊,令彼得入,亦令得入無生忍法。爾時,大眾白童子言:「善哉!童子!我等今者隨童子去,往詣彼所,覲見世尊,并欲供養。」爾時,無攀緣菩薩摩訶薩共彼眷屬徒眾百千,圍繞恭敬在於彼前,從波羅奈大城而出,徑詣佛所,為欲覲見及供養故。

爾時,於彼剎那羅婆牟休多時,從於北方去此佛剎,過六萬四百千億佛土,有佛名曰住菩提分轉如來,十號具足。於彼佛剎有菩薩摩訶薩,名曰開敷神通德,從彼沒身生此剎土閻浮提中,毘耶離大城,大將師子,於彼家內忽然化生。爾時,開敷神通德菩薩摩訶薩生彼家已,即說偈言:

「頗聞佛世尊, 增長釋種家, 度脫諸厄難, 無量百千億。 頗聞佛世尊, 無邊智慧海, 精進及禪定, 甚深達彼岸。 如來拔毒箭, 得忍心調柔, 為眾常說法, 亦不著法相。 頗聞佛世尊, 不著於三界, 世間行不行, 智慧遍一切。 欲界及色界, 乃至無色界, 能以智稱量, 彼眼者在不?」

時大將家有一天女名轉菩提分, 化作人形現童子前, 以偈報童子 言:

「世尊住一劫, 或復過一劫, 汝後當見佛, 今且受五欲。 食勝妙福祿, 猶如大王家, 種種妙音聲, 歌舞作倡等。」

爾時,童子具知如來已益眾生、諸天人等善根成就,以偈報天女言:

「彼愚癡眾生, 樂於五欲樂, 不聞下遍知, 及諸佛教法。 五欲無堅牢, 我不受五欲, 誰能信五欲? 万欲如刀劍, 猪狗及野干、 騾馬牛驢等, 此輩貪五欲, 諸佛聲聞訶; 盲瞎根殘缺、 痤陑及變跛, 如是等貪欲, 諸佛聲聞訶; **蚍蜉蛺蝶蠅、** 俱[翅-羽+只]羅孔雀, 我勝彼故訶。 如是等行欲, 譬如大火坑, 熾然閻浮滿, 彼如盲墜墮, 貪欲亦如是。 諸欲無常苦, 智者所呵責, 此等為欲轉。 若人不知過, 世尊已證知, 我不受五欲, 能聞此義者, 當知彼如佛。 彼須彌山王, 我從佛邊間, 彼佛當滅度。 於後夜分時,

我等速往詣, 盡諸結使者, 恐使世尊滅。 轉菩提分尊, 最勝人所說, 於億千數劫, 難逢種善根。 若於涅槃所, 觀見釋種尊, 當生善種子, 若愛釋種幢, 速見大名稱。」

爾時,開敷神通德童子菩薩摩訶薩說此偈已,與諸眾生無量百千左右圍繞,最居眾首,從毘耶離出,徑詣佛所,欲禮佛足,親覲供養。

四童子三昧經卷上

隋北印度健陀羅國三藏闍那崛多譯

爾時,世尊右脇臥於師子床上。時四童子從四方來,各與大眾前後圍繞,導在眾首,悉皆平等,智慧神通、威德法行,無所差別,不乖毫毛,共趣佛所,往到佛前,恭敬合掌。彼四童子到佛邊時,各隨城邑所從眷屬、一切天人、百千眾生雜類,皆悉合掌,一切靜心,歡喜踊躍,曲躬瞻仰向四童子。

彼四童子當於來時,四方縱廣滿一由旬,諸天雨華遍滿於地,鼓天音樂種種百千,諸天歌詠讚歎無量。爾時,多陀阿伽度、阿羅訶、三藐三佛陀普於四方自然顯現四師子座。爾時,尊者阿難以偈白佛言:

「世尊!何因緣, 一切智四邊, 右脇現四床, 師子廣大敷?」

作是語已,佛告阿難:「阿難!汝見此四童子已不?從四方來,面如滿月,過日光明蔽四天下,威德特尊齒白明耀,發智慧光得大精進,入甚深智成就功德,識智了達有深信行,謙卑慚愧行業滿足,意見深遠得正念定,智慧善巧有大方便第一總持,為諸眾生隨順說法,增長善本,於無量億百千佛所種諸善根。各住四方,各於佛剎聞我涅槃,各從彼剎諸如來所諮發啟請,生此剎土,欲聞見我及我名稱,說法利益功德之事,觀看今日如來後夜分時,於力士生地娑羅雙樹間,當入無餘涅槃、不思議涅槃、一切世間無等涅槃、一切世間希有涅槃、一切世間安樂涅槃、一切世間難伏涅槃、一切世間斷離諸趣清淨涅槃,如來當取如是微妙最上涅槃。

「阿難!此東方來童子者,其色微妙,具大功德,端正可喜,光明 遍照,威德熾然,猶如盛火放大光明,以多百千徒眾圍繞、及以億 數諸天之眾,所共供養,受天雨華,來詣佛所,欲供養佛。

「阿難!此童子者,於彼師子音鳴聲如來國土,曾作轉輪聖王,領 千世界而得自在,諸天人等之所供養。彼治化時,於欲界天上及於 人間恒多講法,受持句義,為於無量百千眾生解說妙趣,成就彼等 種諸善根,得諸神通達解法行,眾聖諮嗟無邊無斷,最上微妙得無 畏力,深入法相成就辯才,智慧善巧得到無邊智慧彼岸。滿足如是 諸法行已,於十八億年如法治化,不用刀杖惱亂眾生、不為受欲貪 於王位,於彼十八億年成熟十八那由他眾生,令住阿耨多羅三藐三 菩提,於菩薩法得不退地。彼善男子從初發心得不退地已,乃至畢 竟成就阿耨多羅三藐三菩提,彼王如是,於後一時剃除鬚髮、著袈 裟衣、捨家出家。

「即出家已,於八十一億年行於梵行。從出家已,未甞坐臥,況復 睡眠?於八十一億年中,乃至不起一念欲想及於瞋心,況有殺害、 惱亂等心、無不善事及憎愛想?亦復不念修行、不修行想。常住二 法,何等為二?一者雖得肉眼,無肉眼想;雖能分別知諸法聚,而 不取著法聚之想。於彼八十一億年中,更不論說諸無利益、他餘事 想:若地想、水想、火想、風想,若虛空想及識想,若婦女想及丈 夫想,飢渴想、聚落想、空閑處想、城邑等想,違逆之想、不違逆 想,遠離想、禪定想,自我想、他我想,色想、無色想,邊想、中 想,生想、滅想,少想、多想,如是等諸餘亂想,皆悉寂滅,不生 分別;惟除二十篋藏法本,思量修習。

「其間成熟八萬那由他眾生,決定於阿耨多羅三藐三菩提,彼諸眾 生皆初發心於如此剎;即剎那羅婆時,於彼佛剎自在而去,各更別 往諸餘佛剎,到彼諸剎世尊所奉覲承事;於彼世界一一佛剎,一一 身到,一身一事無二並者,彼諸剎土一一諸佛皆同;於此一剎那羅 婆時右脇而臥,同於此日後夜分中當入涅槃,悉在娑羅雙樹之間力 士生地,皆如如來彼諸佛等,同名釋迦牟尼十號具足,彼諸佛等亦 同出於五濁惡世。

「阿難!我以如是無量、無邊、無礙肉眼正知正見,非諸聲聞、辟 支佛等之所能入,非境界故。阿難!若有比丘、比丘尼、優婆塞、 優婆夷聞此法門,聞已生信,羨我肉眼正知見智,欲得此智,乃至 滿足一切種智,及發一念正信之心相續不捨,適發心已,即生無量 福德之聚,況得無量無邊大功德聚?

「阿難!若有善男子、善女人,於十八那由他諸如來所,復於十八 那由他億年,以一切樂具供養、恭敬、尊重、讚歎,親承奉事彼諸 如來,於十八那由他年,所得功德雖復無量,猶故不及聞此法門羨 願之心生功德者,不可譬喻。

「阿難!此童子者,於我法中一日一夜,教化、利益無量眾生,何 況多時所作利益?若舍利弗、目犍連等及餘聲聞,不能如是多作利 益,度脫如是無量眾生。

「阿難!假使汝等一切壽命,多諸眾生說法教化,不念餘事,晝夜 不休,雖作如是教化利益,但自汝等於我法中,不能荷負佛法重 擔。如今所見此來童子所荷負者。」

又復告言:「如是,阿難!如是童子為諸眾生作大利益,具足憐愍,念諸眾生、饒益眾生,而此童子有無量功德。

「阿難!汝見從南方來童子已不?如秋滿月十五日夜,光明熾盛, 右手執持眾寶,莊嚴杖打此大地,打大地已,出如是聲:譬如摩伽 陀國有一寶器——或用金作、或用銀作,作之成就善加瑩治,無有 塵垢、無有瑕隙、無有破漏,善好明淨,無有塵土、無有脂膩,種 種因緣眾事所成,種種功能練精,明淨五處、具滿十處,遠離一千 分觀瞻、遠離十二處金銀煩垢,種性真正金性最勝,百練所成,新成非故具,足八分一千巧匠,一心觀瞻,塵膩垢翳一切悉無——如是妙器打之出聲,若聞聲者能滅眾苦。

「阿難!如是譬喻,如是器聲,我少說耳。而此童子,眾寶間錯嚴 潔之杖,打此大地所出之聲,亦復如是。

「阿難!此童子者名寂靜轉,是大菩薩摩訶薩也。從南方寶積現多 陀阿伽度、阿羅訶、三藐三佛陀剎土而來。彼佛世界名寶莊嚴。

「阿難!於汝意云何?彼世界何故名寶莊嚴?阿難!彼佛世界,無一眾生住不定者,亦無邪定。阿難!彼諸眾生。皆悉正定於阿耨多羅三藐三菩提。阿難!彼剎是菩薩剎,彼剎眾生無男女想。阿難!彼諸眾生皆悉梵行,無諸穢欲智行清淨,乃至無有穢欲之名。阿難!彼莊嚴佛剎諸眾生等,無有一切不善思想,亦無食想,唯有二食。何等為二?一者以定慧為食,二者以法喜為食。阿難!彼佛剎不說五陰、不說三乘,惟廣演說一切智陰菩薩篋藏。阿難!以是義故,彼佛世界名寶莊嚴。

「阿難!此土所有他方佛剎眾生生此土者、復有願生彼佛土者,願生之者彼眾生等,皆得不退轉於阿耨多羅三藐三菩提。阿難!或有菩薩從餘佛剎來生彼者,生已,即自能知彼佛剎內一切諸事,彼等菩薩亦生彼已,即於剎那羅婆牟侯多時,各各想己自身是佛。

「阿難!彼寶積現如來為彼無量無邊那由他諸菩薩摩訶薩等,廣說一切種智及菩薩篋藏法門,不曾斷絕、更不說餘。阿難!假使我於無量千劫,說彼佛剎功德之事,及一一分別菩薩摩訶薩等所得勝法,所謂發願莊嚴佛剎,不可得盡。阿難。我但略說彼佛世界功德名字。此寂靜轉菩薩摩訶薩從彼方來,為欲看我入般涅槃,復為憐愍無量無邊諸眾生等,令發無上菩提之心;復為欲顯彼剎功德莊嚴

之事;復為顯彼寶積現佛利益名稱。所謂顯諸菩薩法行大事,亦說 真實名稱之事,欲令此剎無量無邊諸眾生等攝受正法故,來到此釋 迦佛剎,為令未來諸菩薩等生歡喜心。

「阿難!此童子者,於往昔時行菩薩行,值燃燈佛出現於世,爾時 曾作轉輪聖王名曰降怨。

「阿難!爾時降怨聖王為無量億無邊眾生說於正法,成熟善根。時彼聖王從旦日初至於食頃,化度三十六億眾生住不退地,於阿耨多羅三藐三菩提,入正定聚證得無生忍法。而此聖王於彼燃燈如來般涅槃後,發大精進,剃除鬚髮,捨家出家。既出家已,滿一千年,續燃燈佛轉正法輪。然彼聖王利益無量無邊眾生,作利益已,於後一時日沒之頃,復化三萬六億眾生,令住阿耨多羅三藐三菩提;還於日沒之時,令七萬那由他眾生皆悉漏盡,成阿羅漢,況當證道見諦學人不可稱計。

「阿難!假使我欲以佛智慧,說此寂靜轉菩薩童子往昔之時為諸眾生作利益事,不可得盡。阿難!汝為此寂靜轉善男子就於我前,敷座安置,汝當得無量無邊勝妙功德。若有眾生聞此寂靜轉菩薩名者,彼等眾生,如現在見佛等無有異。

「阿難!若有眾生聞此功德,莊嚴受記法本名字者,乃至一念發淨信心,為欲見彼寶積現如來、多陀阿伽度、阿羅訶、三藐三佛陀, 為欲承迎、禮拜、親近、供養,有發心者、欲聞法者,阿難!我今 皆與彼等受記,往生彼剎,奉覲如來,聞於正法。彼佛剎中所生菩 薩,亦欲同行彼諸法行,惟除願力菩薩摩訶薩等。阿難!彼諸眾生 善得大利,若能聞此所說功德莊嚴法本名字,乃至經耳,何況聞已 得淨信心? 「阿難!如是等法句,如實不虛,汝當善護、善念、憶持。所以者何,阿難!閻浮提人未曾得聞如是等修多羅章句及以名字?阿難!若名字菩薩及謗法人,如是人等,莫令得聞。何以故?以其謗法罪大深重故。

「阿難!汝見西方如是輦輿眾寶莊嚴乘空而來,汝見已不?」阿難 白佛言:「如是已見。」

佛復告阿難:「汝見其間一童子不?二足神通變化所作,騰空飛來 動此大地,動大動、震大震,大地動時,所化眾生怖畏毛竪。」阿 難報言:「如是婆伽婆,如是修伽陀,我今見已。此童子者,神通 遊戲種種示現,乘空而來。」

佛告阿難:「如此輦譽眾寶間錯,在童子前而來,出於種種異妙之香,滿此佛剎。」阿難白言:「如是婆伽婆,如是修伽陀。」

佛復告阿難言:「此事還是彼善男子智力所現,能使輦輿出是妙 香。阿難!汝聽復能出於四種之聲——所謂空聲、無所有聲、寂靜 聲、佛聲。」阿難白言:「如是婆伽婆。」

佛復告阿難:「還是童子毛孔所出如是等聲。阿難!此聲出時,有 六十八那由他眾生大得饒益,復千世界諸眾生數有多眾生,於無為 法心漏永盡,便得解脫。阿難!聞一佛名,已有九億菩薩住不退轉 地,得入聖道於阿耨多羅三藐三菩提。於此剎土人天世界,有二百 千那由他天人得阿毘跋致地,決定住阿耨多羅三藐三菩提。

「阿難!此善男子所住西方,有佛名曰喜樂音多陀阿伽度、阿羅 訶、三藐三佛陀,世界名樂毛,從彼剎來,欲見如來入於涅槃。此 善男子,然其來已,為於無量無邊眾生作大利益。阿難!今善男子 來此剎時,大作佛事,亦如如來轉大法輪,彼亦如是轉大法輪。阿 難!此善男子乃從阿僧祇劫已來諸毛孔中恒常出此四種之聲——所謂空寂等聲——於一一聲中,為無量無邊眾生作大利益。」

阿難白佛言:「世尊!此善男子往昔之時作何善根,乃能於諸毛孔出如是諸聲?」

佛告阿難:「我念往昔過去無量無數劫,時有佛出世,名無垢眼,善逝、世間解、無上士、調御丈夫、天人師、佛、世尊。此善男子於彼佛所出家,作大沙門,名曰智樂,淨修梵行。而彼沙門於彼如來問於真理、難知智慧、甚深句義:所謂不生不滅、一切諸法空無所有、一切諸法本性寂靜、一切諸佛皆同一體。而彼沙門七日七夜相續不斷、不念疲惓、不念餘事、不捨重擔,於此四句躬自受持,善味諷習,善持通利,善意貫穿,研精己行。

「阿難!彼時沙門者,此童子是也。以此四句妙義——億數諸佛所 共說之——入諸佛法,攝諸眾生,復自然得覺了之事。而彼沙門愍 諸眾生,緣諸村舍、聚落、城邑為彼說法。

「阿難!爾時法師智樂沙門者,以多聞知法義趣,復以真心六年為他宣說如是法句。以是因緣,於阿僧祇劫,從諸毛孔出如是聲神通。以是事故,此善男子從身毛孔出如是四種法聲,為多眾生作大利益。如是次第,此童子者於阿僧祇劫身毛孔中,成就如是四種妙聲。

「阿難!閻浮提人得大善利、得第一利,若聞此無攀緣菩薩名字者,已獲善利,況聞其法?阿難!若有善男子及善女人,或在天中、或在人間,聞此無攀緣菩薩,乃至名字,已得淨心,所得功德不可思議,何況瞻對觀觀見者?所以者何?阿難!此無攀緣菩薩摩訶薩於諸菩薩地已得功德,不可思議、不可稱說。阿難!而此菩薩摩訶薩故,欲來見如來入般涅槃。

「阿難!汝今可為彼大菩薩施設床敷於如來前,用擬此善男子坐。 阿難!汝當得大安樂利益,亦當速得勝妙神通。阿難!汝設此敷業 因緣故,所獲果報,或坐、或臥常得安隱,於一念頃,當現證得阿 羅漢果無為聖法。阿難!汝於無漏聲聞聖果未證入者,我今與汝授 記當得,汝復應有諸功德分,迴向阿耨多羅三藐三菩提,當得諸佛 如來大法。

「阿難!若有比丘、比丘尼、優婆塞、優婆夷,若天、若龍、若夜 叉、若犍闥婆、阿修羅、迦樓羅、緊那羅、摩睺羅伽、人若非人、 及餘眾生,聞此寂靜轉所說授記,聞已得淨深心及信解者;若復有 人欲得聞此寂靜說授記法門,或如來邊聞、或聲聞邊聞,復能為彼 法師敷設床座,所得功德,如彼法師坐此座上,復當說斯寂靜說授 記法門,如斯無異。所以者何?阿難!彼人敷設座已,當得十種敷 設功德。何等為十?一者、當得轉輪聖王座,二者、得帝釋座,三 者、得梵天王座,四者、得世主座,五者、世世於諸佛所得法師 座,六者、菩薩地滿既得位已,在道場菩提樹下坐於蓮華師子高 座,七者、證一切智已,得無上菩提坐於佛座,八者、轉大法輪 時,得無量億數諸天所共莊嚴轉法輪座,九者、欲現大神通時,過 出一切諸世間道,為得如來無上顯現最大神通師子高座,十者、欲 現入於大涅槃時,得彼多陀阿伽度、阿羅訶、三藐三佛陀,令諸 天、龍、夜叉、犍闥婆、阿修羅、迦樓羅、摩睺羅伽、人非人等心 生歡喜,得清淨信,最後寂滅一切諸行,住金剛三昧得如來座。阿 難!汝當得如是等十種師子高座果報。

「阿難!若有善男子、善女人,淨心聞此寂靜說受記法本句偈之義,為於法師敷設法座,愛敬尊重彼法師故,以是因緣,彼彼成就十種師子敷座果報。以是義故,阿難!汝應可合掌向無攀緣菩薩邊,汝應當得大利安樂大福德聚,因此功德,汝速當得發於神通。」

爾時,尊者阿難為無攀緣善男子敷法座已,合掌向無攀緣菩薩摩訶 薩生清淨心、尊重心、慚愧心,即於爾時而說偈言:

「合掌向健兒, 降伏龍入定, 大智眾王者, 無攀緣光明。 得智及精進, 智慧禪定聚, 世間無等侶, 向無畏合掌。」

爾時,世尊以偈告阿難言:

「汝今敬合掌,供養無攀緣, 所獲諸果報,我當為汝說。 阿難合掌敬,自我涅槃後, 的對舍聚落,及我弟子間, 於村舍聚落,或出彼村落, 或此彼村落, 可如威儀中, 一切威儀中, 當作大佛事。 就於入縣世間, 或識及無識, 悉皆向汝邊, 恭敬而傴身。

「若男、若女,天男、天女,及諸外道波利婆等,若沙門、婆羅門、若王、大臣,若國師,若兵將及餘官屬,若長者、居士,自餘凡類但是有形,乃至六畜、象、馬、走獸及諸飛鳥,若見汝者,皆得淨信;一切樹木、藥草、苗稼、所有華果,悉皆向汝傴身恭敬;一切臺殿、屋宇、重閣、樓櫓、却敵、竅孔、車乘、輦輿,以汝福德威光之力覆蔽於彼,皆悉如是向汝傴身。

「阿難!譬如多陀阿伽度、阿羅訶、三藐三佛陀初證阿耨多羅三藐 三菩提得無礙解脫時,一切苗稼、樹木、藥草及諸華果,乃至略說 人非人等,周匝充滿菩提道場,皆向如來傴身恭敬。阿難!如是, 如是。汝今以此於無攀緣善男子邊合掌傴身因緣力故,汝於却後一 切威儀隨所在處,人非人等,一切苗稼、樹木、藥草皆當向汝傴身 恭敬。 「阿難!若有善男子、善女人於如來涅槃之後,或於我今現前之頃,須臾聞此莊嚴說授記法本,乃至一合十指掌、一念因緣、或以真心思惟此義發一信心,彼人尚得如是福報,如我前說。如是,阿難!當來之世少有眾生得聞此法,亦復少有,但聞如是法本名字,若一聞再聞,尚不可得,何況聞已,得真信心、恭敬尊重、不生誹謗、滅除疑惑、思惟修習、生實想者?我於如是善男子、善女人等,復以佛眼悉皆現見、復以佛智悉皆現知,如是人等,非於一佛所修行供養、非一佛所種諸善根。

「阿難!今在此眾集會我前,一切大眾、天人、男女故來,欲見如來世尊入於涅槃。阿難!如是等眾,於當來世彌勒菩薩初欲證於阿耨多羅三藐三菩提時,受智位已後,乃至坐於菩提道場,設大供養,尊重恭敬。如是次第,乃至彌勒世尊入涅槃時,亦復觀看,還於爾時在如來邊,亦復得見此四童子如是聽法。如今我前得見得聞無攀緣善男子於毛孔內廣聞大法微妙之聲,得聞聲已,生大歡喜。是故,阿難!汝今得聞說如是等微妙義趣,汝應數數傴身,合掌淨心敬信。所以者何?汝以如是淨心敬信善業因緣,所在之處一切眾生、諸天、世人恭敬供養,尊重讚歎,躬傴汝邊,乃至於汝涅槃之後,諸天世人起塔供養汝之舍利。」

爾時,世尊告阿尼婁陀言:「阿尼婁陀!汝見上界有四十億諸天人眾,聞此經典,皆悉合掌傴身而住。」阿尼婁陀白佛言:「如是婆伽婆。」

佛復告阿尼婁陀:「彼天人等因聞此法,信心合掌,傴躬善根,於 未來世阿僧祇劫不墮惡道,或在天上、或在人間,於恒沙世流轉生 已,一一得作轉輪聖王,一切生處恒值諸佛,於諸佛所成就善根。 成善根已,乃至得證阿耨多羅三藐三菩提,同一名號,名為一切眾 類傴身多陀阿伽度、阿羅訶、三藐三佛陀。」 說是語已,時大眾中有諸力士及其眷屬各有五百,其名曰娛樂力士、頭俱耶力士、大力力士、天威力士、勝天力士、郁干蹉力士、無畏力士、婆藪力士、真實力士、優多羅力士、婆儔力士、一切忍力士,如是等一一力士,各及眷屬五百圍繞,聚集來會在其眾首,為欲供養向如來所,皆半傴身,合掌悲泣,哀哽大叫,流淚雨面,而白佛言:「世尊!我等今者,為欲供養如來世尊及無攀緣童子菩薩,并餘無量大菩薩等、乃至一切大德聲聞,此修多羅微妙句義清淨法門,為供養故,合掌傴身。世尊!我等以此一念善根,迴向阿耨多羅三藐三菩提。」

爾時,世尊即便微笑。諸佛法爾,若微笑時,即從口出種種微妙雜 色光明——所謂青、黃、赤、白、金色玻<mark>瓈</mark>——放斯光已,遍至無 量無邊世界,光明所照乃至梵宮,還來旋遶世尊三匝,從佛頂入。

爾時,慧命阿難見是事已,即以偈頌而白佛言:

「世燈何因放, 如此大光明? 善哉決我疑, 及餘眾生等。」

佛告阿難:「汝見已不?此力士子一心集聚,合掌向我及無攀緣童子菩薩,并於此經至心淨信,復發無上大菩提心。」阿難白言: 「見已,世尊!」

佛復告阿難言:「此力士子,從今已後阿僧祇億劫不墮惡趣,然後 證得阿耨多羅三藐三菩提。」

爾時,世尊欲重宣此義,而說偈言:

「阿難!汝不見, 摩羅子集聚, 心生大歡喜, 曲躬而向我? 歡喜說此言, 當得無上道。 大智力士子, 此等供養我, 及於無攀緣, 於法生尊重, 我諸聲聞等,如是合掌已, 阿僧祇劫數,當不墮惡道。 因此合掌業,及向我曲躬劫, 假令一劫說,或無數億劫土。 成就諸佛土。 於最勝行,成就諸佛工測 於億數等劫, 於億數等劫, 於億數等劫, 於億數等劫, 於億數等劫, 是最後相見。」

佛復告阿難:「阿難!汝見從北方有大金光照耀來已不?彼之威光 映蔽一切,其方所有樹木、苗稼、藥草、華果,山崖、堆阜、臺 殿、樓閣,輦輿、車乘,人非人等,於上虛空皆成一色,所謂金 色。」阿難白佛言:「如是婆伽婆。」

佛復告阿難:「汝見北方復有七閻浮檀金輦輿從彼來不?中央輦輿 其上童子結加趺坐,威光最勝,功德巍巍。」阿難白佛言:「如是 婆伽婆,我今已見。」

佛復告阿難:「北方去此剎土六十四百千俱致,有佛剎名曰俱蘇摩 拔坻(隋言多華)。彼剎世尊號名菩提分轉多陀阿伽度、阿羅訶、三藐 三佛陀。彼佛剎中有此童子菩薩摩訶薩,名曰華敷神通德,從彼捨 身來生此土。

「阿難!彼世界出諸法聲,名曰菩提分音。彼處眾生有聞聲者,成諸善根。阿難!彼菩提分轉如來,從證阿耨多羅三藐三菩提已來, 六十四千劫現在說法。阿難!彼如來無有聲聞眾,唯菩薩眾。阿 難!譬如灌頂轉輪聖王多有諸子,彼諸子等,為作大臣、為作國 師、為作諸小國王;如是如是,彼佛如來諸菩薩等亦復如是,亦名 為子、亦名大臣,彼佛亦爾。有二菩薩最為殊勝,於諸菩薩獨為侍 者,還以菩薩而為僧寶。阿難!如是次第說彼佛剎,皆悉菩薩滿彼 國界。 「阿難!彼佛世界資生所須,皆悉豐足無所乏少;具足無畏安隱快樂,微妙可瞻人民充滿,菩薩功德皆悉滿足;住諸神通最為殊勝,以三昧力問旋往返;猶彼朋友智慧之聚,最為殊勝智藏滿足;常能修習菩提之心,常能講論一切智法,於諸菩薩一切深法,無量無邊皆悉證得。阿難!如是等諸菩薩摩訶薩滿彼世界。彼佛剎中,此華敷神通德菩薩摩訶薩——善男子——來生此土閻浮提毘舍離城。彼善男子今現神通而來此者,為欲頂禮如來足故,又欲觀見如來世尊入大涅槃。

「阿難!此大光明現者,是彼如來多陀阿伽度、阿羅訶、三藐三佛 陀威神之力。阿難!所謂此七閻浮檀金輦輿者,是彼如來七菩提分 助道法故,為作化現。

「阿難!此閻浮提有無量千俱胝諸眾生、諸天人等,共此童子,往 昔已來同種善根;而此童子亦生此間閻浮提時,令彼眾生即得歡喜 踊躍無量,復有眾生當得漏盡、或有眾生當得學地、或有眾生得無 學地、或有眾生未發菩提心者當能令發菩提之心、或有眾生發於本 性不退忍心。

「阿難!如此童子,處中輦輿加趺坐者,所出光明,此之光明是彼如來神通威力之所現耳,從此光明出生彼之六輦輿也。阿難!汝看,以彼如來威神之力,此華敷神通德菩薩摩訶薩能於此處現種種神通,又此光明之力,於此世界能為無量無邊諸眾生等,作大利益,所謂以彼正法,共相攝受。」

爾時,彼童子等悉皆和合,歡喜踊躍,復與無量百千眾生前後圍繞,於一剎那之頃兩種種華,詣向佛所。到已,頂禮佛足。

爾時,世尊告慧命阿難言:「阿難!如來為諸眾生所可作者,及如來長子諸菩薩摩訶薩等所應作者,我於今者皆已具足;我為眾生所

作利益者,今已作竟。阿難!此華敷神通德菩薩摩訶薩在於閻浮檀金輦輿中儼然而坐,所作神通以如是等,教化那由他眾生證於阿羅漢果,復教俱胝那由他數眾生已得學地,復有百俱胝數眾生令於三寶得生淨信、受持五戒,復有七百俱胝諸天令得住於不退轉地、決定當得阿耨多羅三藐三菩提,復有七俱胝眾生令住無生法忍,復有無量阿僧祇那由他俱胝眾生,當令值遇彌勒世尊初首法會。」

四童子三昧經卷中

四童子三昧經卷下

隋北印度健陀羅國三藏闍那崛多譯

爾時,慧命阿難白佛言:「世尊!惟願世尊或住一劫、或減一劫,憐愍此等諸眾生故。所以者何?如來、多陀阿伽度、阿羅訶、三藐三佛陀若住世者,如是大事常現於世,又令是等真善大士,數數往返閻浮提內。我等眾生復應於此如許時間,當見此等菩薩大眾承事供養;又於此時,如是經典復應當得廣行流布;復如許時,我等得聞合佛法義;如許時間,令我得見如來世尊及大士等種種現化神通之力。若如來今日不住於世、入涅槃者,我等眾生於如來世尊滅度之後遠離三事。何等為三?所謂不見佛、不聞正法、三者不見此等大士弘廣之心,亦復不得承奉供養;有如是失。」慧命阿難說是言已,悲號大哭,憂歎懊惱,涕淚滿目,宛轉在地,如斫樹倒,並唱是言:「我等速疾共佛別離,諸善知識亦復別離。」

爾時, 眾中有菩薩摩訶薩, 名曰善思義, 以偈白慧命阿難言:

「阿難莫憂惱, 諸行悉無常, 世法欲常者, 此處不可得。 若言有諸行, 此言不可得。 汝今何憂苦? 如是諸法空, 諸智皆悉空, 於佛智亦空, 佛尚不可得, 汝今何憂愁? 汝莫牛分別, 智者捨分別。 諸有如虚空, 如陽焰似水, 象馬諸乘等, 亦如幻師化, 園林眾聚落, 樹木諸花果, 世諦亦如是, 如幻化無實。 諸佛及聲閏, 亦如是不異。」

爾時,慧命阿難以偈報善思義菩薩言:

「如是如所說, 諸法無有相, 此最為勝法, 我今最後聞。 云何向舍衛, 所問我何報? 『阿難!佛何在? 世眼何時來?』 我昔往彼處, 常見佛世尊, 今往彼處空, 大智我那住?」

爾時,寂靜轉善男子復向慧命阿難以偈白言:

「汝於億年哭, 此事難可得。 阿難!汝諦觀, 法界難見處, 譬如芭蕉莖, 葉葉皆除去。 其間無有實, 法體亦如是 道如天降雨, 普有為亦然。 泡起已還滅, 普有為亦然, 泡起已還滅, 有眼者觀見。 如水沫揣聚, 世相亦如是 野如鏡中像, 其體無有實。 三界世相爾, 智者莫涕泣。」

爾時, 慧命阿難以偈報寂定菩薩摩訶薩言:

「我非不知此,如汝智者說, 三相皆無常,經中大仙說。 但此億數天,泣淚皆啼哭, 向我邊叫喚,以是生我苦。 世尊不久去,捨我等眼者, 我等何趣向? 誰能救護我? 正法從誰聞, 寂靜深無比? 我今供養誰? 嗚呼!佛難見!

爾時,無攀緣菩薩摩訶薩以偈告慧命阿難言:

「尊者阿難起, 但觀法莫憂, 法無有來者, 亦無有去者。 譬如佛有生, 證菩提亦爾; 譬如轉法輪, 涅槃亦如是。 諸佛不曾生, 亦復不曾滅, 如是真法中, 阿難何以哭? 汝聞我毛孔, 出如是諸聲, 諸有空寂靜, 佛等四種事。」

爾時,慧命阿難以偈白無攀緣菩薩摩訶薩言:

「大士等不久, 各各別剎去, 彼國見諸佛, 說於甘露法。 汝聞彼佛法, 甚深諸妙義, 見彼佛徒眾, 及諸菩薩等。 今我億數天, 哭泣而圍遶, 世尊涅槃已, 智者我那住?

優婆塞千數, 今日承聽我,

大苦惱憂悲, 我云何慰喻?

三十三焰摩、 兜率及他化、

自在及梵天、 如是等天來,

云何令歡喜? 釋牛王滅後, 云何宣彼法? 我口云何辯?

諸天問我時: 『阿難!尊何在?』

使問我何報? 人牛王滅後, 一切諸處所, 甚深如來住, 我於經行林, 今在何處所?」

爾時,開敷華神通德善男子以偈白慧命阿難言:

「我以知汝行, 善於三月中,

數現身向汝, 阿難莫哭泣。

自餘千數佛, 我告為汝故,

諸佛為汝說, 化作釋種身。

諸佛有慈念, 以汝好事佛,

當來向汝邊, 阿難莫大哭。

天等諸世間, 今日可憂悲,

如是大教師, 隱寂而不現。

如來昔曾說, 壽命住億劫,

諸行念念滅, 我對教師聞。」

爾時,慧命阿難住於佛後,三大叫喚而說偈言:

「眾生所歸者, 能與彼等眼, 導師入滅後, 眾牛轉盲冥。 聞此不善言, 勝王阿闍世, 導師入滅後, 憂苦云何住? 勝人今涅槃, 於後力十子, 悲號大哭泣。 如是等憂惱, 彼等集聚已, 最後見導師, 敬心而尊重, 合堂以曲躬。 天龍夜叉滿, 縱廣五由旬, 此處無空缺, 人類無入處。 雨微妙香華, 充滿至于膝, 復雨諸末香, 供養最勝仙。 難陀、優波陀, 及六十億龍, 悉來涅槃處, 最後見導師。 摩那斯婆論, 娑伽羅、大龍、 睺嘍、月直陀, 各百億圍澆, 散灑此大地, 起雲雨香水, 最後見導師。 降大雨而來, 諸天雨天華, 及雨淨香水, 天龍等敬心, 供養世尊故。 阿耨達龍干, 六十俱胝等, 雨種種寶雨, 到人牛干邊。 伊羅鉢啼哭, 須彌子大蛇, 供養世尊故, 最後奉見佛。 諸龍有百千, 億數那由他, 起雲震雷電, 來到導師所, 彼等澍大雨, 清淨諸香水, 亦為供養故, 最後見世尊。 夜叉千億數, 或百那由他, 念佛諸功德, 皆來欲見佛。 悲泣滿面淚, 復有四天王, 來至導師邊, 最後觀見佛。 諸天眾圍澆, 釋提摩那民, 已來到佛所, 六十三千數, 彼等雨天花, 微妙曼陀羅, 及雨栴檀末, 供養最勝仙。

毘求螺髻梵, 二梵眾圍澆, 悲泣到佛所, 最後見如來。 淨居天威力, 多百億諸天, 號哭到佛所, 以佛今涅槃。 種種悲哀泣, 諸天百億數, 勸請大導師, 願住於一劫。 魔子大智慧, 名娑陀婆訶, 愉快到佛所, 勝仙涅槃故。 捧執世尊足, 偏身勸請佛, 願愍世間故, 釋干住一劫。 為大仁諸天, 世尊若住者, 當不思議利, 請尊住一劫。」

爾時,無攀緣善男子以偈告彼一切諸天、世人及諸梵天王、商主、 魔王子等,而說偈言:

「汝等悉不知, 小兒如獼猴, 恒常心放逸, 以何號啼哭? 譬如猪睡眠, 忽起失本念, 被刀斫剝時, 驚怖馳奔走。 我意如是見, 汝等皆如是, 古不聞法者, 以貪放逸故。 片智慧炬, 为應作善業。」

爾時,世尊告慧命阿難及富婁那、須菩提,并不空見王童子、迦葉上座、大俱絺羅及諸上座:「今告汝等諸比丘言,將汝右手來與我。」彼諸比丘聞佛世尊如是言已,即白佛言:「善哉!世尊!」

爾時,諸比丘等滿一千人,各以右手奉授世尊。爾時,世尊復以左手執彼一切諸比丘右手。執已,復以右手執羅睺羅及阿難手,付與諸比丘手中,口遺囑曰:「汝等比丘!我阿難賢及羅睺羅上座,今付囑汝等,遺囑汝等。」於如是時,出大叫聲、如是叫聲悲號啼哭,震動天地甚大可畏,而彼大聲遍此佛剎。爾時,羅睺羅、阿難

當付囑時,眾中五百比丘見是事已,便捨身命。所以者何?彼諸比丘不忍見佛入於滅度,彼作是念:「寧使我等先入涅槃,不忍見此世間大燈、世間導師、大慈悲父、最善知識、憐愍眾生、常與世樂,今入滅盡,我豈忍見?」

爾時,於彼剎那羅婆浮休多時,五百諸佛各住自剎,皆伸右手與釋 迦牟尼。爾時,世尊又以手執阿難、羅睺羅上座手,付囑與彼如來 手中,而說偈言:

「此我羅睺子, 阿難我侍者, 今在諸佛前, 我付囑此二。 我當入涅槃, 於今後夜分, 更不復見我; 天龍及人等, 救護憐愍者, 亦無有歸依, 覆不思議慈。 惟除諸世尊, 我觀諸世間, 不思議無量, 不見一眾生, 今我為誰住? 無量千數劫, 猶如恒河沙, 我於如是劫, 為一眾生住。 我已利眾生, 有信敬心者, 自餘無信心, 億佛不能化。」

爾時,五百諸佛異口同聲而說偈言:

「尊已眾生利, 尊作佛事已, 現種種神通, 擊大法鼓竟。 已充億眾生, 如雲雨潤地, 拔眾生毒箭, 釋種大仙人。」

爾時,長老阿難、慧命羅睺羅兩膝著地,以偈白彼諸佛曰:

「大丈夫勸請, 令尊住一劫。 以佛威力故, 一切見眼者, 最勝二足尊, 大智住世故, 多有眾生信, 得利不思議。 增長諸天人, 阿修羅減少, 聲聞及菩薩, 多生不思議。」

爾時,彼五百諸佛告慧命阿難及羅睺羅言:「汝等善男子!莫大啼哭、莫大愁憂。本性如是、事盡如是、真實如是、諸行如是;一切有為法、一切作法、一切世諦法,悉皆如是。盡際如是,已捨身命,如來行乃無量,以世諦法如是,故不得自在。又如來者,是法身,非有為身,無住世法,汝等不應請如來住。諸善男子!汝等且止,到我佛剎,釋迦如來即時當伸右手,當放光明,彼之光明照我剎土。照彼土已,汝等還來見釋迦佛在汝等前為汝說法,令汝等聞。是故,汝等莫大憂愁。」

爾時,世尊入於三昧。住三昧已,即伸右手,於右手中乃至大拇指端、及於左手諸身節分,乃至千輻輪處足相之中、及手足柔軟網縵相中,赤銅色瓜甲、及以十指妙色掌文寶手之間,皆悉放於百千億光明。一一光明化生蓮華百千億數,一一華臺化出化師子高座百千億數,一一座上見一佛坐,一一化佛教化無量百千億眾生——其間或得漏盡、或得離欲地——如是一切諸相好中所放光明,事相皆亦如是;如是等臍輪之間及陰馬藏相,亦復如是;面輪眉間亦復如是。

爾時,世尊從於頂上放百千種光明,一一光明端化出蓮華百千億數,一一花臺化作師子臺座百千億數,一一座上化一佛坐為說妙法。彼諸如來不說餘法,唯說菩薩密藏修多羅及諸陀羅尼金剛章句,為人顯說清淨三輪如來諸力無畏法等似彼法門。一一化佛一一說法,能淨無量無邊眾生令住不退轉地,向於阿耨多羅三藐三菩提。

爾時,世尊於娑羅雙樹間,右脇師子臥床中,化現一佛右脇而臥。 化已,自身即至活大地獄中。到彼處已,身放光明。放光明已,其 光遍照活地獄中。爾時,世尊以此光明照於活大地獄已,而說偈言:

「此眾生數死,數數還復活, 又不捨彼想,故生諸苦惱。 世有此聖出,世尊能作明, 能說諸正法,滅除諸苦惱。 無為亦無盡、無滅亦無行, 若能如是解,彼不墮諸趣。」

爾時,如來說是偈已,於彼剎那羅婆摩休多時,令彼活大地獄三十億數諸苦眾生便得捨身。即捨身已,生於三十三天。爾時,世尊復至三十三天還說此偈,以佛神力聲遍一切諸大地獄。彼地獄趣無量百千億諸眾生,捨地獄身生兜率陀天,得生天已,還復憶念前所說法,皆得阿那含果。

爾時,諸天子得法果已,證法、證果,入於諸法,共說偈言:

「譬如大曠路,有智慧商主, 度脫多眾生,被賊諸獸者。 世尊亦如是,無上大商主, 能脫億眾生,縛在生死中。 我等歸依佛,光明大商主, 於我起慈悲,能脫諸苦惱; 我等歸依法,我等身已證; 我等歸依僧,功德難思議。」

爾時,世尊以涼冷光明普照阿鼻脂地獄處。作涼冷已——除滅熱惱一切苦毒,成就諸法千數億分,能令一切得諸喜樂,愍哀潤益一切眾生,安慰柔軟哀憐喜慶利益眾生,合三空門,無相、無願及以無作——告彼地獄諸眾生等,而說偈言:

「空法及無相, 無生及無滅, 若解如是法, 彼即脫惡道。」

爾時,八百千億眾生得聞偈已,此偈所說三世無礙,是諸法分成百千種,已至耳邊清淨微妙。聞是聲已,從於阿鼻脂大地獄捨地獄身,即生他化自在天宮。爾時,世尊住梵天宮,復說此偈言:

「眾牛最上樂, 無有諸苦處、 名相所說處、 及諸顛倒想。 健兒應當捨, 即免諸苦惱, 諸想皆顛倒, 及著非色想。 三界何有樂? 數數流轉生, 死已復更生, 增長相續苦。 能以智知空, 亦不著於空, 彼人即知空, 不著知空者。 此知法義已, 亦復無有我, 既不得於我, 此處何有苦? 空是無為法, 相亦不可得, 能見無我智, 此是直佛子。」

爾時,彼百千億數諸眾生等所生之處即得無漏天仙妙果,即便憶念宿命之時受地獄苦,復念如來丈夫功德,知報佛恩,先取滅度;又復不忍見於如來、多陀阿伽度、阿羅訶、三藐三佛陀入於涅槃,時諸天子已得果者,異口同聲而說偈言:

「我等不忍見大慈,調御丈夫入滅度, 能為眾生作光明,我不忍見先取滅。」

作是語已,即於此處入於涅槃。

爾時,世尊於彼剎那牟休多時,從梵天宮便自隱身,即至娑羅雙樹之間。爾時,世尊作如是念曰:「我於今日後夜分時入於涅槃,即是最後見於眾生。我今當可令其歡喜,滅一切苦而受快樂,顯現如來大神通力,令彼眾生即便得入安隱之門。欲顯如來無餘涅槃,合諸佛意故示神通。」

爾時,世尊作是念已,欹右脇臥,猶如師子心無所畏觀察十方一切大眾,猶大龍象。如是觀已,即以右足第一拇指,按此大地出大音聲,六種震動遍十方界,示現無礙不思議光照曜十方。爾時,世尊從身諸相復放光明。放光明已,一一毛孔復出微妙恒河沙數微妙光明,一一光明遍照恒河沙等諸佛剎土——彼之光明不相雜入,無所妨礙——如是數數從毛孔中,次第放諸微妙光明;如是毛孔各各次第復放光明,還復如是,遍照如前。

爾時,世尊更復顯現作諸神通。現神通已,以佛神力、佛護持力, 令諸眾生皆得具足,所見境界佛眼無異。彼諸眾生住此佛剎,皆悉 覩見如來光明所照一切諸佛剎土。

爾時,世尊告諸比丘:「汝等見彼東方世界有城,周圓縱廣一千由旬,如是廣大,上下亦爾,以諸微塵百千億數滿此國城,汝等見不?」諸比丘白佛言:「如是婆伽婆,如是修伽陀,我等皆見。」

佛復告曰:「汝諸比丘於意云何,此微塵數是為多不?」諸比丘 言:「如是,如是,婆伽婆。」

佛復告言:「諸比丘!若有人能於諸法中知如是等無為之法,不 生、不滅、無漏、無為。如是知者,彼諸眾生得脫諸苦一切惡 道。」

當於爾時,有三十億諸眾生等,聞此法已,即得阿那含果。

既得果已,異口同聲而說偈言:

「無為法無盡,無漏亦不滅, 聖法如是知,我等證寂滅。 知以如是得,如實知諸根, 為憐愍眾生, 示現因緣法。 如來化我等, 拔除毒箭病, 一切智與藥, 及與於涅槃。 智炬今速疾、 智眼不久滅, 億眾苦逼切, 從活地獄出, 拔箭大醫師、 治眾生病者, 能救無數眾, 令不墮惡道。」

爾時,世尊立住黑繩大地獄岸上,放大光明遍照彼大地獄,拔於彼處無量眾生置於天上。如是等熱惱地獄、大熱惱地獄,亦皆如是; 叫喚、大叫喚大地獄,眾合、大眾合地獄,拔出無量無邊眾生,安置善道及涅槃道。

爾時,世尊復以金色光明照八大地獄。其光明力能令眾生所觸身者皆得安樂,遍體潤益,身心歡喜,苦惱消除;眼目所觀心地歡慶,快得清涼,從慈悲生,令身安隱。光明遍照大地獄已,滅諸熱惱和軟流潤,彼大地獄所有眾生在大火聚熾然中者,與彼樂故,於諸毛孔次第而放如是光明。

爾時,世尊以大光明普覆一切無量眾生,令心柔軟堪任法器,具足無量百千功德,以微妙語而說偈言:

「我與世間樂,解脫諸憂苦, 見諸苦逼切, 示現涅槃道。 我所說諸法, 寂靜無畏樂, 若能知彼法, 此不墮惡趣。 能歸依佛者, 彼人得大利, 百千諸劫數, 更不見諸苦。」

爾時,如來說此偈已,即於剎那羅婆牟休多時,諸比丘眾及諸眾生 多於前數,復有無量無邊諸佛,右脇而臥師子床上,彼諸世尊從師 子床起,還復示現如是神通。

爾時,彼四部眾白佛言:「世尊!此諸佛等皆悉欲於剎那羅婆牟休多時,入般涅槃現神通耶?如今世尊所現無異。」

佛告諸比丘:「如是,如是。彼諸佛等今日同欲捨最後身入於涅槃,彼諸佛等悉皆同名釋迦牟尼,皆於力士所生之地娑羅雙樹,臥師子床,今後夜分當入涅槃。」

爾時,世尊於南方及西南方、西方及西北方、北方及東北方、東方 及東南方、上下二方,遍告十方諸比丘言:「汝等比丘!見於東方 無量無邊諸佛世尊證得阿耨多羅三藐三菩提不?」

諸比丘言:「如是,如是,婆伽婆,我等皆見,以世諦故見,非第 一義。」

佛復告諸比丘:「譬如四天下世界微塵悉滿,乃至從金剛際至梵天宮,諸比丘!於汝意云何?頗有人知其數不?能以譬喻知其數不?」

諸比丘言:「不也,世尊!難可得知。」

佛復告諸比丘:「譬如前所說微塵譬喻,如是等四天下世界,如是百千億世界,皆悉充滿彼微塵眾。諸比丘!彼所有微塵,如是等微塵,我以肉眼見此世界諸佛世尊所住在東方,如一步地,但以肉眼無礙、無分別,見前世界如向所說;如是南、西、北方四維、上、下,亦復如是。

「諸比丘!譬如四大天下諸世界,若百千億數滿彼微塵,從金剛際至梵天宮,所有微塵,一一方面,各有若干諸佛世尊,一一方面,我皆現見此諸世尊坐於道場,或有已坐或始坐者,彼等一切諸佛世尊,皆悉同名釋迦牟尼;如是復有無量諸佛,與然燈佛同一名號;我復見有諸佛世尊名勝一切,亦同名號;如是一切諸佛同名蓮華上,如是等上佛同一名者,如是上名稱佛同一名者;如是拘樓孫佛同一名者;如是拘那含佛同一名者;如是迦葉佛同名號者;如是各各佛同名號者,我在於此皆悉現見。彼諸佛等各名號,我於世間

得最勝法、微妙法、無極之法,但有能稱名者皆得善根。彼等諸佛 各各名號如是無邊,如是等諸佛世尊,我住於此皆悉現見;如是等 現在世間種種名字,或入無餘涅槃、或現住世轉於法輪,我住於此 悉皆現見。彼佛世尊,於我肉眼無礙無妨,皆現在前。

「諸比丘!如來如是復勝此知,更復勝知不可思議,更復不可思議 無量無邊,復有無量無邊如是等無量知見。諸比丘!以是義故,如 來智見無邊,如是無邊不可稱量,如是不可稱、如是不可思議,但 以肉眼,況復盡於諸佛智法?

「諸比丘!譬如此刹所有一切眾生,若在家、若出家,彼諸眾生假 使悉成阿耨多羅三藐三菩提,具足十力四無所畏。彼諸世尊有一善 男子,能以四事供養承事,足滿一劫尊重恭敬,種種樂具諸莊嚴 事,無量無邊不可思議。復有善男子、善女人等,能信我此顯示一 切諸佛所說法門,乃至一念頃能生實想不起疑心,彼人即於發心之 時所得功德,近諸如來所有功德,復勝三千大千世界所有眾生證得 諸佛一切智已,經劫供養,得福雖多,不如於此法門生一念信,福 多於彼。若有菩薩信此智者,彼之菩薩即得近諸世尊阿耨多羅三藐 三菩提。」

爾時,世尊說此肉眼功德之時,有六十二億諸眾生,迴向阿耨多羅三藐三菩提者,還生退心。所以者何?佛阿耨多羅三藐三菩提難可證故,我等但於此處,滅盡諸苦,取漏盡果;復有無量無邊眾生住於學地;復有十那由他菩薩成就最初發菩提心;復有三十二億諸菩薩等得無生忍法。

爾時,魔王波旬愴快苦惱,泣淚滿面,白佛言:「世尊!我為何事欲令多陀阿伽度、阿羅訶、三藐三佛陀早入涅槃?乃令無量無邊眾生出我境界。今者,世尊!東方黃晦日未現頃,所作佛事如住一

劫、若住一劫,未能過此利益度脫多數眾生。所謂住於般涅槃道,如來今者,令我境界悉皆空虛。」

時魔波旬說是言已,佛告波旬:「汝莫啼哭,波旬!汝猶大有不作 善業及不信者,是汝朋友在汝境界,汝是彼伴。」

爾時,世尊即以甲爪取地上塵,告魔波旬:「於汝意云何?為我爪上土塵多耶?為此大地上塵多乎?」

作是語已,時魔波旬白佛言:「世尊!指甲上土少不足言。」

如是語已,佛告波旬:「譬如甲上土塵甚少,我所度眾生入涅槃者,復少於此爪甲上土。波旬!譬如大地土塵甚多,無量無邊,在汝境界眾生亦復如是,甚多無量。波旬!汝莫憂愁,應生歡喜。何以故?眾生在汝境界多大地土故。波旬!然諸眾生自作不善,去涅槃遠,非汝所為。所以者何?但眾生界無有邊際。波旬!汝欲所作但當作之,如來今日於後夜分當入涅槃。」

爾時,世尊告諸比丘:「汝諸比丘!見此世界諸佛已不?」

諸比丘白佛言:「世尊!如是,如是,婆伽婆,我等已見。」

佛復告諸比丘:「此諸佛剎復多無量,汝等當知見諸佛剎莊嚴已不?復見諸菩薩莊嚴淨土已不?復見諸聲聞莊嚴已不?」

諸比丘白佛言:「世尊!如是婆伽婆,如是修伽陀。」

佛復告諸比丘:「如來如是知見,復倍上數知見無量,更復無量皆悉了知。諸比丘!假使我於一劫所說如是佛剎莊嚴之事,如我見於十方世界,亦復如是;假使於一百劫、於一千劫、億載數劫、那由他劫,更倍譬喻,廣分別說,猶不可盡。

「然,諸比丘!導師所作者,為諸聲聞所作已訖於,於一切處我已 說訖,示現內外諸法,真心示現,皆已說竟。諸佛於法無有悋惜無 不辯者,乃至一莖草、等一毛髮許。汝等比丘!從今已去,應須如 法,勤而修行。我已為汝示現涅槃、我已為汝說涅槃道、已成就眾 生善根,我所證得阿耨多羅三藐三菩提,乃於往昔行大苦行及於難 行。汝等今者於彼大法具足受持,勿令隱沒。汝等應作如是修 行。」

爾時,世尊現大神通,十方諸佛所有說法及說法處,此剎眾生皆得聞知;彼諸如來所有教勅,所有眾生承奉教勅皆已證知;復有恒河沙數眾生,住於三種智;復有十億百千諸眾生等,發菩提心,住於阿耨多羅三藐三菩提;復有十百千億那由他諸眾生等,住於辟支佛地;自餘諸眾生等得漏盡證;如是次第無量無邊阿僧祇、不可數、不可量、不可思、那由他諸眾生,聞此法已得大饒益。

爾時,世尊告諸比丘:「汝等比丘!當知我今不久涅槃。汝等!應當護持如來教法,為自利、為他利故。汝等諸比丘!應當如是修學。」

佛說經已,慧命阿難及天人、龍、阿修羅、揵闥婆等,一切世間, 聞佛所說,頂戴奉行。

四童子三昧經卷下

CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".